

I MANI LA NGA TA LAHLEKA ?

Ku ni vanhu lavo tala lava nga rhandziki ku vulavula hi tlhelo ra mhaka leyi, hi ku chava leswaku va nga tshuka va kuma ntiyiso wa mhaka ya tihele. Va chava leswaku va nga tshuka va tivona va wela etiheleni hi ku hatlisa. Vanhu vo tala va ringeta ku miyeta ripfalo ra vona hi marito lawa: Xikwembu i Xikwembu xa rirhandzu, xi nga ka xi nga cukumeti munhu etiheleni. Hi marito lawa va anakanya leswaku emhaka ya vona ya vutomi lebyi nga heriki yi vulavuriwile, yi herile, kutani vutomi bya vona bya vudyoho byi ta amukeleka etilweni. “Xana a mi swi tivi leswaku lavo biha va nga ka va nga dyi ndzhaka ya ku fuma ka Xikwembu xana? Mi nga tshuki mi lahleka: loko va ri va thyaka, ni lava gandzelaka swifaniso, ni vaoswi, ni swipombolo, ni loko va ri vaSodoma, ni vayivi, ni lava navelaka rifuwo, ni vapyopyi, ni lava hlevaka vanwana, ni lava dyelelaka; lavo tano va nga ka va nga dyi ndzhaka ya ku fuma ka Xikwembu.” (1 Kor. 6:9,10). “A ku na xilo xa thyaka lexi nga ta nghena kona, hambi la endlaka manyala ni vunwa; kambe ku ta nghena ntsena lava tsariweke bukwi ya vutomi ya Xinyimpfana.” (Nhlavutelo 21:27).

Ku ni vanwana kambe, lava ringetaka ku kombisa leswaku a ku na tihele, kasi ntlawa wunwana wona wu ni dyondzo leyi endlaweke hi munhu, leyi vulaka leswaku endzhaku ka rifu hi ta basisiwa hi ndzilo, se ku va kona hi ngenaka etilweni. I mhaka leyi hlamarisaka ku vona leswi endlwaka hi vanhu eku fihla ntiyiso wa vukona bya tihele. Vanwana va fihla ntiyiso hi ku vula leswaku a ka ha ri na vutomi endzhaku ka rifu, hi leswaku loko hi fa, hi wona makumu, a ka ha ri na nchumu endzhaku ka sirha. Rito ra Xikwembu ri hi byela leswaku, “ku lerisiwe leswaku vanhu hinkwavo va fa kanwe, endzhaku ka swona ku va ku avanyisiwa.” (Heb. 9:27). Tlhelo rinwana exikarhi ka vanhu va misava ri tshemba leswaku lava nga ta tlhela va hanya endzhaku ka rifu, hi lava nga fa va ri vakriste ntsena, loko va ri vanwana

va to fa, ku va makumu. Ku ni nhlayo leyikulukumba swinene ematlhelweni layo tala emisaveni ya vanhu lava tshembaka leswaku loko munhu a fa, o tlhela a vuyela misaveni hi xivumbeko xa xiluva, kumbe homu, kumbe nyoka, hambi ku ri xihari xinwana kumbe xivumbiwa xinwana. Ka ha ri ni mavunwa lamo tala, lama vanhu va ma pfumelaka leswaku ha wona va ta kota ku biyelela meehleketo ya vona emhakeni ya tihele.

KU NI TIHELE XANA?

Munhu unwe loyi hi tshembaka leswaku o le henhla

ka hinkwavo i Hosi Yesu. O vulavurile leto tala hi tlhelo ra tihele, hikwalaho hi ta teka Matsalwa matsongo eka lamo tala lama tsariweke eRitweni ra Xikwembu, eku vona leswi a swi vulaka. “Munhu hambi a ri mani na mani, la nge ka makwavo: U ni rihuhe, o fanele hi ndzilo wa tihele.” (Mateo 5:22). “Kungaku loko tihlo ra wena ra xinene ri ku khunguvanyisa, ri xokole, u ri cukumeta kule na wena; hikuva swi nga saseka ka wena loko xirho xa wena xi lova xi ri xinwe ntsena, mmiri wa wena hinkwawo wu nga cukumetiwi tiheleni. Loko voko ra wena ra xinene ri ku khunguvanyisa, ri tseme, u ri cukumeta kule na wena, hikuva swi nga saseka ka wena loko xirho xa wena xi lova xi ri xinwe ntsena, mmiri wa wena hinkwawo wu nga

cukumetiwi tiheleni.” (Mateo 5:29-30). “Kambe vana va ku fuma va ta cukumetiwa handle emunyameni, laha mikosi yi nga ta va kona ni ku getsela ka meno.” (Mateo 8:12). “Mi nga tshuki mi chava lava dayaka mmiri, kambe va ri hava matimba yo dlaya moya: kambe chavani loyi a nga ni matimba yo lovisa mmiri ni moya wa munhu etiheleni.” (Mateo 10:28). “Na wena Kapernaum, la tlakusiweke ku fika tilweni, u ta tsongahatiwa ku fikela ndzhaweni ya lava feke: hikuva mahlori lama endlaweke karikwenu, loko ingi ma endlawe Sodoma, muti wolowo a wu ta va wa ha ri



ona ni sweswi." (Mateo 11:23). "Kukotisa fava loko wu tsuvuriwa, wu ya hisiwa endzilweni, swi ta va sweswo emakunwini ya mikarhi leyi. Nwana wa Munhu o ta rhuma tintsumi ta yena, ti ta humesa ehandle ka ku fuma ka yena evakhunguvanyisi hinkwavo, ni lava endlaka leswo biha, ti ta va cukumeta ekheleni ra ndzilo, laha mikosi yi nga ta va kona, ni ku getsela ka meno. Swi ta va tano emakunwini ya mikarhi leyi; tintsumi ti ta huma ti hlawula lavo hamboloka eka lava lulameke, ti va cukumeta ekheleni ra ndzilo, laha mikosi yi nga ta va kona, ni ku getsela ka meno." (Mateo 13:40-42, 49,50). "Yi ku ka yena: Nakulorhi, u ngenise ku yini la, u nga ri na nguvu ya nkhuvo? Yoloyi a miyela. Kutani hosi yi ku ka malandza: Nwi boheni milenge ni mavoko, mi nwi cukumeta emunyameni wa le handle, laha ku nga ni mikosi ni ku getsela ka meno." (Mateo 22:12,13). "Nwina tinyoka, vana va timhiri; mi ta ponisa ku yini eku avanyiseni ka tihele?" (Mateo 23:33). "Kutani valavo va ta ya eku biweni loku nga heriki; Kambe lavo lulama va ta ya evutomini lebyi nga heriki." (Mateo 25:46). Lama i matsalwa ma nga ri mangani lama humaka ebukwini yinwe leyi nge Bibeleni, kambe ka ha ri ni lamo tala.

TIHELE TI FANA NA YINI ?

Siku rinwana, Yesu o funungurile xisirhelelo a hi vonisa matshamelo ya tihele. Eka Luka 16:19-31, Yesu o hi komba leswi tihele ti nga hi xi-swona. O hi komba xinwana xo chavisa ngopfu, lexi nga siki voniwaka hi munhu. Mindzilo ya tihele yi ri karhi yi pfurha hi matimba, kutani kwala xikarhi ka lwandle lerikulu ra ndzilo, ku na munhu. Munhu loyi a nga etlelanga, wa hanyanya, wa hanya, na swona o vona hinkwaswo leswi humelelaka lomu matihelweni ka yena. O karhi wa vona, wa chukuvanya, wa yingisa, wa swi kota ni ku nantswa hi ririmi. Wanuna loyi o tshame a famba-famba ni ku hanya la misaveni kukotisa hina namuntlha. O twile vachumayeri ni vaprofeta, kukotisa lavo tala va hina, leswi hi karhi hi va twaka. Mhaka leyi vavisaka eka swona i leswaku a nga yingisanga leswi vulavuriweke hi Moxe ni vaprofeta, namuntlha swi tano eka lavo tala lava nga riki na mhaka ni Rito ra Xikwembu, ni ku yingisa vachumayeri va rona. Wanuna loyi a nga hleketanga, na swona a nga karhatekanga embilwini hi ta vutomi endzhaku ka rifu. Kumbe na yena o ve ni meehleketo ya leswaku Xikwembu xi lulamile, hikwalaho xi nga ka xi nga nwi cukumeti etiheleni, kumbe ni loko a tshuka a ya humelela kona, ku ta va ni vachumayeri lava nga ta nwi khongelela leswaku a ta huma etiheleni. Nakulorhi, ematshanweni ya swona hinkwaswo, o yile tiheleni, sweswi hi nwi vona kwala xikarhi ka malangavi ya ndzilo.

Wa nga languta nhlomulo enghoheni ya yena, languta mahlo ya yena – u vona ku chava ka yena, hikuva a nga ha ri na ku tshemba, yingisa ku huwelela ka yena, loko a ri karhi a vitana Tatana Abraham, "Ndzi twele vusiwana, u rhuma Lazaro leswaku a peta xintihwana xa yena ematini, a ndzi tsakamisa ririmi, hikuva malangavi lawa ma ndzi vavisa ku tlurisa ... tatana, ndza ku khongela leswaku u rhuma Lazaro endlwini ya tatana: hikuva ndzi ni vamakwerhu va

ntlhanu; o ta va khongotela leswaku va nga tshuki va ta, na vona, exivandleni lexi xa ku xaniseka." Tatana Abraham o nwi byerile leswaku va na Moxe ni vaprofeta, va nga va yingisa. Kambe wanuna loyi a nga la malangavini ya tihele a ku loko ingi unwana wa lava feke o ya ka vona eku ya va byela ta khombo, a va ta hundzuka. Kambe Abraham a ku loko va nga yingisi vaprofeta, va nga ka va nga pfumeri, hambi unwana wa vafi a pfuka.

I vangani vanakulorhi ni maxaka ya hina lava nge ku vavisekeni exikarhi ka ndzilo wolowo wa tihele namuntlha, lava navelaka ku thlelela halenu eku ta hi byela swa ntiyiso ni vukona bya tihele xana? Va nga ka va nga vuyi, hikuva hi ni Rito ra Xikwembu, kutani hi fanele ku ri pfumela. Yesu o pfukile ku feni, kambe xana i vangani lava nga nwi pfumela? A va nga talanga.

Nhlomulo wa le tiheleni a hi wa nkarhinyana ntsena, kambe wu ta va kona hi laha ku nga heriki. "Sukani ka mina, nwina lava rhukaniweke; yanani ndzilweni lowu nga timekiki." (Mateo 25:41). "Kutani Diabolos, la nga va kanganyisa, a cukumetiwa etiveni ra ndzilo ni xivavula ... va ta xanisiwa kona vusiku ni nhlekanhi, hi laha ku nga heriki ... kutani unwana ni unwana la nga ka a nga kumiwanga a tsariwile bukwinu ya vutomi a hoxiwa etiveni ra ndzilo." (Nhlavutelo 20:10-15). "Laha xivungu xa vona xi nga fiki kona, ni laha ndzilo wu nga timekiki kona." (Marika 9:48).

Tihele i xivandla xa ku xaniseka ni nhlomulo ni ku vaviseka. Bible yi hi byela leswaku ku ta va ni mikosi, ni ku getsela ka meno kona. Ndzilo wa vavisa swinene, kutani vanhu va nge tshuki va ba mikosi va rila, va getsela meno loko swi ri leswaku va file kukotisa mbyana, tani hi laha vanwana va tshembaka tano, kumbe loko a ku nga ri na vutomi byinwana endzhaku ka rifu. Kambe vutomi byi kona endzhaku ka rifu, hikuva ebukwini ya Nhlavutelo 20:12, hi hlaya leswi, "Ndzi vona vafi lavakulu ni lavatsongo, va yimile mahlweni ka Xikwembu." Kutani-ke, loko hi tshuka hi ya tiheleni ndzhaku ka rifu, hi ta fanela ku tiyisela eku xanisekeni ne ku vavisekeni ne nhlomulweni wa tona hi laha ku nga heriki.

I MANI LA YAKA TIHELENI ?

Tihele ti lunghiseriwile Diabolos ni tintsumi ta yena. Kutani hinkwavo lava dyohaka ni lava yingisaka rito ra Satana, lava mavito ya vona ma nga ka ma nga tsariwanga eBukwini ya Vutomi, na vona, va yisiwa exivandleni xa lava rhukaniweke. (Mateo 25:41; Nhlavutelo 20:15). Hinkwerhu hi hlayiwa kona, wena na mina, "hikuva hinkwavo va dyohile, kutani a va faneriwi hi ku kwetsima ka Xikwembu." (Rom 3:23). "Hikwalaho, kukota leswi ku dyoha ku ngheneke misaveni hi munhu (Adam) a ri unwe, kutani rifu ri kona hikwalaho ka ku dyoha, hi mukhuva wolowo rifu ri funengeta vanhu hinkwavo, hikuva va dyohile hinkwavo." (Rom. 5:12). Hikwalaho ka xidyoho xa Adam, rifu ri hi funengetile hinkwerhu, kutani wena na mina hi fanekele hi ku fa. Hi ndlela yoleyo, xi dyoho xi werile henhla ka mina na wena, kutani hinkwerhu hi vadyohi

emahlweni ka Xikwembu. Hi ni ntumbuluko wa vudyoho, ni ku navela ku dyoha, ni ku tiarisa mahlweni ka Xikwembu. Vanhu a va dyondzisiwi ku dyoha, kambe va dyoha hi ntumbuluko. Kambe vanhu va dyondzisiwa leswaku va yingisa Xikwembu, va ta tinyiketa eka xona, ni ku xi tirhela. Kambe hikwalaho ka xidyoho lexi funengeteke vanhu hinkwavo, hinkwerhu a hi faneriwi hi ku kwetsima ka Xikwembu, kutani hi kongoma etiheleni. Hambu ha swi lava ni loko hi nga swi lavi, hi karhi hi rhetemukela kona etiheleni leti chavisaka.

Va tele lava khongelaka va ku, "Hosi, Hosi, va ri karhi va endla mitirho ya kereke hi viki ni viki, kambe a va tivi Hosi, Muponisi wa vona, na swona, a va tswariwanga ra vumbirhi. Na vona, va ta kumeka etiheleni hi vunyingi." (Mateo 7:21-23). Ku ni lava titshebaka leswaku vona i vakriste, kambe va nga humesi mihandzu leyinene, na vona, va ta cukumetiwa ndzilweni. (Mateo 7:19). Mitirho ya nyama, leyi ngi a yi nga faneri ku kumeka eka hina, i "vumbhisa, ni vugangu, ni vuoswi, ni ku khongela swikwembu swa hava, ni vungoma, ni ku vengana ni timholovo, ni vukwele, ni ku kariha, ni ku alana, ni madzolongi, ni ku avana, ni makwanga, ni ku pyopyiwa, ni makolo, ni leswo tano, leswi ndzi mi byeleke rivaleni, kukotisa leswi ndzi tshamaka ndzi mi byela leswaku, lava endlaka leswo tano, va nga ka va nga dyi ndzhaka ya ku fuma ka Xikwembu." (Gal. 5:19-21). Loko hi tivula vakriste, vanhu va misava a va fanele ku vona leswi eka hina: "rirhandzu, ni ku tsaka, ni ku rhula, ni ku tiyisela, ni ku tsetselelana, ni vunene, ni ku tshembeka, ni ku olova, ni ku tikhoma." (Gal. 5:22-24).

Lava nga ta kumeka tiheleni hi lava nga ka va nga hlantswiwanga hi Ngati leyi pfumalekaka, ya Yesu, lava nga hundzukungiki eswidyohweni swa vona, lava nga amukelangiki Nyiko ya Xikwembu, leyi nga Vutomi lebyi nga heriki, ni lava nga kandziyela Ngati ya Yesu hi milenge ya vona, hikwalaho ka ku tiarisa ka vona.

Hosi yi vulavurile na Nikodema, loyi ngi a ri mufundzisi, yi ku: "Loko munhu a nga tswariwi ra vumbirhi, a nga ka a nga voni ku fuma ka Xikwembu." (Yohane 3:3). Kutani Hosi a yi ri karhi yi nwi byela leswaku hambu leswi a nga mufundzisi ni munhu lonene, kambe a ha pfumala xilo xinwe: ku tswariwa ra vumbirhi, hikuva handle ka sweswo a nge koti ku nghena etilweni. Hi sweswo, na hina loko hi nga tswariwanga ra vumbirhi, hambu loko hi nga va ni mahanyelo lamanene, kambe hi ta ya etiheleni.

"Xana loko mi ehleketa, a hi ku biwa loku tlurisaka loku a nga ta ringanisiwa ha kona, loyi a kandziyeleke Nwana wa Xikwembu, loko a ringanise leswaku ngati ya ntwanano leyi a hlantswiweke ha yona a hi nchumu, a engeta a sandza Moya wa tintswalo xana? Hikuva hi tiva la nge te: ku rihisa ika mina: ndzi ta tirhisela ndzi ri mina, ku vula Hosi. Na kona kambe o te: Hosi yi ta avanyisa tiko ra yona. I mhaka leyi chavisaka ku wela emavokweni ya Xikwembu lexi hanyaka." (Heb. 10:29-31).

I MANI LOYI A HI YISAKA ETIHELENIXANA ?

Vanhu vo tala va vula leswaku leswi Xikwembu xi nga ni rirhandzu, xi nga ka xi nga hi yisi etiheleni. Loko swi ri tano, vanhu va ya tiheleni hikwalaho ka yini-ke? Kambe hikwalaho ka rirhandzu ra xona, Xikwembu xi hi endlele ndlela ya ku chupuka ha yona, kutani munhu unwana ni unwana o fanele ku tihlawulela lomu a rhandzaka ku ya tshama kona hi laha ku nga heriki. Xikwembu xi tshiketele wena na mina leswaku hi tihlawulela, kutani hi tshunxekile ku tihlawulela lexi hi xi lavaka eka leswimbirhi, tilo kumbe tihele. Loko hi lava ku ya tilweni, hi kombiwile ndlela ya kona, kambe loko hi tshika ku amukela ndlela ya ku hlayiseka ya Xikwembu, kumbe loko hi tihlawulela ku kala hi nga yi amukeli hikwalaho ka ku rhandza ku titsakisa nkarhinyana hi swidyoho, kwalaho hi tiyisa hi ri hina etiheleni, hikuva hi yona ndlela ya ku ya kona. Wena na mina hi kombiwile ndlela ya ku ya tilweni, ni leyi yaka tiheleni, kambe tsundzuka leswaku hi wena na mina lava faneleke ku tihlawulela ndlela leyi hi nga ta famba ha yona kukondza hi ya fika makunwini ya yona.

HI TA CHUPUKISA KU YINI ?

Xikwembu xi hi lulamisele ndlela ya ku chupuka ha yona, leyi nga xaviwiki hi mali, leyi na wena u nga ta chupuka ha yona hambu loko u nga ri na dyondzo leyi tlakukeke, a ku faneri ku rhanga u kuma mahanyelo lamanene u nga si yi amukela, na swona, a ku faneri ku rhanga u yi tirhela loko u nga si yi amukela. Ndlela ya Xikwembu i ya mahala, yi kumiwa hi mudyohi ni lowo lulama. Kutani yi nga twisiseka ni ku amukeriwa hi xihlangi lexi nga dyondzangiki, kasi swi tano ni ka lonkulu. A hi ku hlamarisa ka yona, yi kwetsimile, yi tisa ku rhula ni ku tsaka. Ndlela ya Xikwembu yi tshunxa ndzhwalo wa swidyoho emakatleni ya hina, joko ra Xikwembu ra olova, ni ndzhwalo wa yena wa vevuka. (Mateo 11:29,30).

Ndlela ya Xikwembu hi nga yi kuma loko hi tisola, ni ku fularhela swidyoho swa hina. Hi fanele ku va ni ku tisola ka xiviri hikwalaho ka swidyoho leswi hi nga swi endla, kutani hi swi fularhela hakunene. "Sweswi ndzi tsakile ... leswaku tingana ta nwina ti humese ku hundzuka: ... hikuva ku khomiwa hi tingana hi mukhuva lowu rhandziwaka hi Xikwembu, ku humesa ku tisola loku nga ni ku hanya." (2 Kor. 7:9,10). "Loko swi ri tano vekani mihandzu leyi fanelaka ku hundzuka." (Mateo 3:8). "Ndzi ri ka nwina: ku tsaka ku ta va kona ematilweni hikwalaho ka mudyohi a ri unwe la hundzukaka, ku tlurisa ku tsaka loku nga ta va kona, hikwalaho ka lava lulameke va ntlanu wa makume, na mune wa makume, na ntlanu na mune, lava nga faneriki hi ku hundzuka." (Luka 15:7). "Ku tsariwe sweswo, kambe a swi fanela leswaku Kriste a twisiwa ku vaviseka, kutani a pfuka ku feni hi siku ra vurharhu; ku ta vuriwa hi vito ra yena eku hundzuka ni ku rivaleriwa ka swidyoho exikarhi ka matiko hinkwawo." (Luka 24:46,47). "Vunene bya Xikwembu byi kubyisela eku hundzukeni." (Rom. 2:4). Loko swi ri leswaku, hi ku kombisiwa hi Moya lowo Kwetsima, se hi tivona hi ri swidyohi leswikulu, kutani hi tisola hi ku hundzuka.

kunene hi fanele kambe ni ku tivula swidyoho swa hina eka xona, hikuva "Xikwembu xa tshembeka, xi lulamile ku hi rivalela swidyoho, ni ku hi hlantswa ku homboloka hinkwako." (1 Yohane 1:9).

Na swona hi fanele ku pfumela, ni ku amukela hi ripfumelo, leswi Yesu a hi endleleke swona. "Kukotisa Moxe loko a hayekile nyoka emananga, Nwana wa munhu o fanele ku hayekisiwa sweswo: leswaku unwana ni unwana la pfumelaka ka yena a nga tshuki a lova, kambe a va ni vutomi lebyi nga heriki. Hikuva Xikwembu xi rhandzile misava swonghasi, xi ko xi nyika Nwana wa xona la nga tswariwa a le swakwe, leswaku unwana ni unwana la pfumelaka ka yena, a nga tshuki a lova, kambe a va ni vutomi lebyi nga heriki. Hikuva Xikwembu a xi rhumanga Nwana wa xona emisaveni ku ta avanyisa misava, kambe hi leswaku misava yi ponisiwa ha yena. La pfumelaka ka yena a nga ka a nga avanyisiwi; kambe la nga pfumeriki, wa avanyisiwa, hikuva a nga pfumelanga vito ra Nwana wa Xikwembu la nga tswariwa a le swakwe. La pfumelaka Nwana o ni vutomi lebyi nga heriki; kambe la nga yingisiki Nwana, a nga ka a nga voni vutomi, kambe ku kariha ka Xikwembu ku tshame henhla ka yena. (Yohane 3:14-18, 36). "Ndzi vurisile ndzi ri ka nwina: La yingisaka rito ra mina, a va a pfumela ka la ndzi rhumeke, o ni vutomi lebyi nga heriki, kutani a nga ka a nga ti ku avanyisiweni, kambe o sukile ku feni ekù nghena vutomini." (Yohane 5:24). "Hikuva mi hlayisekile hi tintswalo, hi ku pfumela, kutani leswo a swi humi ka nwina, i ku nyika ka Xikwembu." (Efesa 2:8).

Kutani hikwalaho ka leswi Adam a nga dyoha, rifu ni xi dyoho swi wele henhla ka vanhu, kambe leswi Yesu, Nwana wa Xikwembu, yena la nga dyohangiki a feke ematshanweni ya wena na mina, hi nga kuma vutomi lebyi nga heriki. "Kukota leswi hinkwavo va faka hikwalaho ka Adam, hinkwavo va ta tlhela va hanya ha Kriste." (1 Kor. 15:22). Kutani u nga swi vona leswaku leswi hi nga ta endla swona i switsongo, na swona, a swi vitani hakelo. Lexi hi fanekeleke ku xi endla i ku hundzuka, ni ku tisola, hi amukela Yesu Kriste, leswaku a va Muponisi wa hina. A nga yena la rihaka nandzu wa kona, ni ku hi nyika swona. O hi xaverile ku hlayiseka loku hi vutomi bya yena exihambanweni xa Kalvary, a basisa timbilu ta hina hi ngati ya yena leyo hlawuleka. Wa ha ri yena la hi rivalelaka milandzu ya hina leyo tala, o hi nyika matimba ya ku endliwa vana va Xikwembu, kutani wa hi amukela, a hi endla vana va yena. Vonani, ku hlayiseka loku hlamarisaka lo'ko kwetsima, loku Yesu

a hi nyikaka kona. Xana a wu lavi ku amukela ku hlayiseka loku, u amukela Yesu sweswi-ke?

Munhu unwana lowo biha a a ri karhi a khorwisa mukriste leswaku vukhongereri bya yena a byi pfuni nchumu, hikwalaho na yena a nga ka a nga pfuni nchumu. Mukaneti yoloyi a ku: "Yesu wa wena o ku endlele yini?" Mukriste a ku: "O ndzi ponisile." Wanuna lowo biha a vutisa a ku: "I yini?" Kutani loko a ri karhi a vula marito lawa, ku hleka ka yena a ku kombisa ku kaneta. Mukriste a hlamula a ku, "wa nga huma na mina hi nyangwa, ndzi ta ku komba." Se hi loko ha vambirhi va humela handle. Kutani mukriste a rholela matluka yo talanyana, a aka xivala xikulukumba ha wona. Kaku loko a hetile a ya lava xivungu, loko a xi kumile, a xi veka exikarhi ka xivala lexiyani. A teka meciso, a tshivela ndzilo lomu matlhelweni ka xivungu, loko mukaneti a ri karhi a langutisa hi ku hlamala. Kambe kaku loko ku hisa ka ndzilo ku tshinelela xivungu, xona xi sungula ku tshombonyoka, xi hlalahlala, xi ri karhi se xi komba leswaku xi le ku vavisekeni, kambe xi tsandzeka ku huma la xivaleni. Kutani mukriste a tshambuluta voko ra yena hi ku hatlisa, a susa xivungu ekhombyeni, a xi veka ebyanyini bya rihlaza, laha ndzilo ni khombo swi nga fikiki kona.

"Hi sweswo," ku vula mukriste, "Leswi Kriste a nga ndzi endlela swona. A ndzi ri emalangavini ya tihele, ma ndzi rhendzerile, kutani a ku ri hava ndlela yo chupuka ha yona. A ndzi ri mudyohi lonkulu, loyi ngi a avanyisiwile, kutani a ku sele ntsena leswaku ndzi lovisiwa, kambe Yesu a ndzi ponisa hi ku fela swidyoho Swa mina, andzi wutla endzilweni kukotisa mungu loko wu susiwa ndzilweni."

Nakulorhi, leswi u yaka ndzilweni wa tihele, xana a ku rhandzi ku languta eka Yesu xana? Hundzuka, tivule swidyoho swa wena eka yena, pfumela, u nwi amukela o ta ku ponisa. U nga tshuki u hlwela, kambe u nwi amukela sweswi! Kwala u nga kona, hambu ku ri kwihi ni kwihi, chulula mbilu ya wena sweswi eka Hosi Yesu, hikuva wa ku rhandza. A nga lavi leswaku u lova. O lava ku ku ponisa. O yimele ku twa ku rila ka wena. Huwelela eka yena sweswi, kutani o ta tshambuluta voko ra yena leri tlhaviweke, a ku susa endzilweni, a ku veka ebyanyini bya rihlaza, laha ku ngari ki na khombo ra ndzhukano lowu nga heriki. Kutani o ta ku veka endleleni leyi yaka tilweni. Tshemba eka yena sweswi!

M.R. Gschwend.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

For **free** Gospel literature, books and tracts in over 540 languages, write to:

EMAIL: info@angp.co.za

ALL NATIONS GOSPEL PUBLISHERS

P.O. Box 2191, PRETORIA, 0001, R.S.A.

(A Gospel Literature Mission financed by donations)

(Reg. No. 1961/001798/08)